

Lawatan PM China eratkan lagi hubungan dua negara

Kuala Lumpur: Lawatan Perdana Menteri China, Li Qiang ke Malaysia minggu depan memberikan peluang besar untuk memperkukuhkan lagi hubungan erat yang terjalin antara kedua-dua negara sejak 50 tahun lalu, sekali gus membuka peluang untuk jalinan kerjasama baharu.

Penasihat utama di Pusat Penyelidikan Pasifik Malaysia, Dr Oh Ei Sun, berkata hubungan Malaysia-China yang terjalin telah berkembang daripada hubungan diplomatik hingga kepada interaksi ekonomi yang meluas dalam perdagangan dan pelaburan.

“China adalah rakan dagang terbesar Malaysia dan Malaysia secara konsisten menjadi rakan dagang terbesar di Asia Tenggara.

“Asas kukuh ini menyediakan peluang terbaik untuk kerjasama yang lebih erat,” katanya kepada BERNAMA.

Li Qiang yang memegang jawatan Perdana Menteri China pada Mac tahun lalu, dijadualkan melawat Malaysia dari 18 hingga 20 Jun.

Felo Kanan di Institut Hal Ehwal Antarabangsa Singapura itu berkata, lawatan Li Qiang menawarkan potensi untuk meningkatkan kerjasama khususnya dalam rangka kerja Inisiatif Jalur dan Laluan (BRI) bagi memudahkan projek bersama yang memberi manfaat kepada kedua-dua negara.

“Contohnya, Kereta Api Berkelajuan Tinggi (HSR) menghubungkan Malaysia dan Singapura memerlukan pelaburan dan teknologi pembinaan yang boleh memberi manfaat bersama kedua-dua negara. Jika landasan kereta api itu dikaitkan dengan China, hubungan perdagangan akan dipertingkatkan,” kata Presiden Persahabatan Malaysia-China Sabah (MCFAS) itu.

Dalam bidang teknologi, melihat kepada minat Malaysia untuk memanfaatkan bantuan China dalam memajukan keupayaan kecerdasan buatan (AI), Ei Sun mencadangkan lebih banyak universiti China menubuhkan kampus cawangan di Malaysia.

Sementara itu, Profesor di Jabatan Pengajian Kenegaraan dan Ketamadunan Fakulti Ekologi Manusia, Universiti Putra Malaysia, Prof Dr Zaid Ahmad berkata pertemuan antara Li Qiang dengan Perdana Menteri, Datuk Seri Anwar Ibrahim adalah platform bagi memperkukuh komitmen bersama terhadap prinsip diplomasi yang saling menghormati, khususnya Malaysia sebagai negara berdaulat.